

四庫全書

集部

欽定四庫全書

吳都文粹續集卷四十九

明 錢穀 撰

詩

次韻寄錢翼之

楊載

有聲吳下頗多年長把漁竿釣海邊  
李賀才名過杜牧  
魯公書法繼張顛  
塵沙撲面驚吾老  
星宿蟠胸媿子賢  
歲晚著書言足妙  
青青林竹正宜編

和孟東野題崑山寺

蘭谷負崑岡鑿崖安佛牀梯雲石磴滑入厨泉水香旦  
寒鳥相聚月黑龍放光舟行苦局促卒憇殊勝場

次韻高李迪別後見寄之作

張羽

客中原少寐看月上林端雁叫楓江夜人棲野艇寒浮  
蹤憐斷梗攪夢怯奔湍不是孤吟懶離羣自少懽

約徐隱君幼文同隱吳興

吳興好山水子我盍遷居繞郭羣峰列迴波一鑑如蠶  
餘即宜稼樵罷亦堪漁結屋雲林下殘年共讀書

畊漁軒寄題徐良夫

之子住銅坑人傳好事名如何同甲子翻遣昧平生野  
岸風中釣湖田雨後耕秋天漸涼冷或可赴前盟

送人之平江投刺李守

送君何處遊一劍古蘇州螭螭黃花節鱸魚碧水秋尋  
碑松陽寺按曲酒家樓況爾多能者膺門必見留

寄王正仲高季廸

祇恨孤城未解圍圍開翻遣別相知夕陽江上恩恩酒

細雨燈前草草詩有夢直從花落後無書空過雁來時  
郭西古寺題名處今日重遊却共誰

別後吟成許寄無定知詩境不荒蕪新詞典雅推摩詰  
古體優長羨達夫華岳羣峯雲霽出梁園萬縵日晴敷  
肯從大厯開元事重擬清談擊唾壺

過何山廢寺

千峯寂寂寺門開石逕春風長綠苔佛閣丹青餘瓦礫  
禪房花木變蒿萊繡經室壞僧應散施食臺空鳥自來

誰料空門亦如此獨臨斜日重徘徊

悼高青丘李迪

燈前把卷淚雙垂妻子驚看那得知江上故人身已沒  
篋中尋得寄來詩

消息初傳信又疑君亡誰復可言詩中郎幼女今癡小  
遺稿千篇付與誰

生平意氣竟何為無祿無田最可悲賴有聲名消不得  
漢家樂府盛唐詩

寄叔方

倪瓚

乖阻方徂秋忽然已改年櫻桃花樓前開落春風顛乘  
船到家日雨砌溜涓涓綠酒仍滿眼素琴久無絃呼我  
共斟酌歡極更惘然處窮則已固言達誰當先俯仰嘆  
鳶魚浮沉各天淵慎勿傷本性木雕而土埏鸞翔安可  
挽青雲氣翩翩猶羨羲皇人清風北窗眠

江南春

汀洲夜雨生蘆筍日出瞳矇簾幙靜驚禽蹴破杏花烟

陌上東風吹鬢影  
遠光搖曙劍光冷  
轆轤水咽青苔井  
落紅飛燕觸衣中  
沉香火微縈綠塵

春風顛春雨急清淚泓  
泓江竹濕落花辭枝悔何及  
絲梧哀鳴亂朱碧  
嗟我胡為去鄉邑  
相如家徒四壁立  
柳花入水化綠萍  
風波浩蕩心怔營

送虞勝伯之雲間求先世遺書

川谷沄沄浙水波  
雍公勛業未消磨  
况當異代求文字  
尚有聞孫校舛訛  
京國不聞收汗馬  
草萊終見沒銅駝



誰陳聖主賢臣頌奈爾陰山敕勒歌

故虞勝伯徵君隱居竹義居甫里垂二十年不屑以  
姓名求知于時之聞人道園先生其叔祖也先世雍  
公所遺文道園先生欲求而不可得勝伯必欲竭意  
以購取之可謂有志而不忘其所自矣聞此書舊藏  
平江俞子中推官宅推官沒已久而子俊州尹其弟  
輒能假以歸勝伯非仁人義士之存心乎州尹贊之  
故人也因書以為之請陶蓬大尹見之當有以教吾

者矣倪瓚頓首

次韻答陳叔方早春見懷

隔江山翠晚依微  
隱映江邊白板扉  
事往依依驚歲改  
老來念念覺前非  
已看庭草侵行徑  
漸有汀花拂釣磯  
慚愧詩篇慰幽獨  
白頭從此莫乖違

清夜哦詩手自書  
也應把燭倩官奴  
瘦牛犂確荒田隴  
肥馬蹢躅笑瓠壺  
且釀松花江水碧  
更分芝朮嶺雲腴  
人間誰覓玄真子  
春雨扁舟釣綠蒲

白馬寺通長老修圓覺期化緣

惠遠深心白蓮社湯休麗句碧雲篇懺摩不懈香燈供  
般若仍通文字禪雨後春池片細細月明寒渚竹娟娟  
東林門外聞鐘返惟有陶公妙入玄

貞壽堂詩為吳縣尹楊奐作

貞壽堂前風日遲天大寸草答春暉兒兮事育心無忤  
母氏康強志不違後日腰懸季子印只今身著老萊衣  
熙然鶴髮照綠酒金鴨火溫香靄微

烟雨申過石湖

烟雨山前度石湖一奩秋影鏡平鋪何須更剪松江  
水好染空青作畫圖

姑蘇城外短長橋烟雨空濛又晚潮載酒曾經此行樂  
醉乘江月卧吹簫

愁不能醒已白頭滄江波上狎輕鷗鷗情與老初無染  
不棄輕軀總是愁

蘇臺懷古

望中烟草古長洲不見當時麋鹿遊  
滿目越來溪上水  
流將春夢過揚州

吳中絕句

醉喚吳姬踏舞筵  
風闌花陣亦回旋  
愁生細雨寒烟外  
詩在青蘋白鳥邊

發吳江

一望洞庭秋水相逢南浦孤蓬江  
千有興騷客間居久  
釣漁翁

泛太湖

遙接太湖惘然尚留赤壁圖景  
越來溪水東西香雪寒梅飄影

登姑胥山

吳王館娃西子兩情斷送長流  
麋鹿淚沾荒草故人汗漫重遊

過盤門

將軍南鎮勾吳魚龍跳下江潮  
無限吁嗟神迹怕聞淒

涼洞簫

歸闔閭浦

極目烟江盡頭屈指姚城渡口世人不理曲肱自餉黃  
鷄白酒

吳鈎行

楊維禎

吳人殺二子譽成雙吳鈎吳王下賞令不識鈎中愁臨  
鈎呼二子飛來父心頭百金何足報萬戶當封侯佩雙  
鈎比明月為君嬖者斬讒者刑制諸侯開伯烈千秋萬

歲光不滅

長洲曲

長洲水引東江潮潮生暮暮還朝朝只見潮頭起郎拖  
不見潮尾回郎橈昨夜西溪買雙鯉恐有郎緘寄連理  
金刀剖腹不忍食尺素無憑膾還委西溪之水到長洲  
明日啼紅臨上頭

五湖遊

鴟夷湖上水仙舟舟中仙人十二樓桃花春水連天浮



七十二黛吹落天外如青虬道人謫世三千秋手折一枝青玉蚪東扶海日紅桑膠海風約住吳王洲吳王洲前校水戰水犀十萬如浮漚水聲一夜入臺沼麋鹿已無臺上遊歌吳歆舞吳劍招鷗夷兮狎陽侯樓船不須到蓬邱西施鄭旦坐兩頭道人卧舟吹鐵笛仰看青天倒流商老人橘幾奕東方生桃幾偷精衛填海成甌窶海盪邱山漂髑髏胡為不飲成春愁

吳城怨

吳兵夜入郢小弟驕父兄彎弓射天日輦土築長城長  
城築未竟客主老蠻荆

夏駕石鼓辭

鼓在夏駕山高一丈徑三尺下有磐石為足古諺云  
石鼓鳴三吳兵

周家十園鼓散落陳倉野猶有夏駕石盤盤駕之下秦  
鞭血出骨吳獵焦野火夏鼓建不拔石鳴知者寡父老  
懼讖言山空石長啞

虎丘篇

路出女墳湖警蹕伯王驅靈池飛霹靂枯冢走於菟老  
禪猶點石仙鬼只疑孤祖龍來發闕銀海又飛鳧

香山篇

放舟脂塘曲盤遊湖上雷雷鳴湖雨作還泊香山隈美  
人鬪香草上有九畹栽美人在何所寒芳招歸來露下  
荊棘草鹿上姑蘇臺

金處士歌

吳郡人金可父賢智有才藝而自埋于民衆皆嘖嘖  
以處士稱之權貴人以丘園料起處士處士遽絕之  
曰予幸有廬一區在市闕可以避風雨田一廛在郭  
外亦可以給衣食學聖人之道可以自樂不願求仕  
也且仕榮利祿隱樂貞素苟以相易彼此兩乖乖而  
欲強合吾不能已吁處士如可父信其逸而貞者歟  
維時集賢舊老相與署牒錫號曰貞逸會稽楊維禎  
乃為之賦詩曰

蘇州古隱君實始虞仲隱居放言中乎清與權次曰澹  
臺氏言不枝行不徑未嘗匍足諸侯前五噫之夫將其  
匹聯耕織為業不廢誦與絃亦有天隨仙配鳴夷子理  
釣船去之五百年求繼者孰賢闔閭古城隱曰有處士  
氏曰金長身而美髯叶風局孤古古貌疏且沉家不失  
箴里不失任有餘推與人矧肯賣祿入心心闕下足終  
南叶貧賤易屈富貴易淫故大隱在闕市不在壑與林  
鳳皇不能引高神龍不能深叶深人呼為處士更加貞

與逸號焉知古不如來今吾嗟今之士科隱丘復事王  
侯行無補闕言無裨謀惟祿食是媒叶詭貞而隱詭逸  
而休以為吾人憂放而還澗恚岳隴羞聞處士風其不  
泯然在穎豈吾人儔

城門曲

謀報越王兵城門夜不扃孤臣睛不死明月照人青

吳農謠

吳農竭力耕王田王賦已供常卧眠鄧通董賢何為者

一生長用水衡錢

吳下竹枝歌

三箸春深草色齊  
花間蕩漾勝耶溪  
採菱三五唱歌去  
五馬行春駐大堤

家住越來溪上頭  
胭脂塘裏木蘭舟  
木蘭風起飛花急  
只逐越來溪上流

寶帶橋西江水重  
寄郎書去未回儂  
莫令錯送回文錦  
不答鴛鴦字半封

馬上郎君雙結椎百花洲下買花枝  
罽毼冠子高一尺  
能唱黃鶯舞燕兒

白翎鵲噪手雙彈舞罷胡笳十八般  
銀馬杓中勸郎酒  
看郎色似赤瑛盤

騎馬當軒鵲觜靴西風馬上鼓琵琶  
內家隊裏新通籍  
不是南州百姓家

小娃十歲唱桑中盡道吳風似鄭風  
不信柳娘身不嫁  
珍珠長絡守宮紅



夜發吳門

趙孟頫

吳樹依依吳水流  
吳中舟楫好夷猶  
多情最是吳門月  
又送行人下秀州

次姚子敬懷王子慶往吳中

闔閭城郭鎮姑蘇  
弔古登臺百感俱  
秋水遠隨潮影沒  
江雲長傍客帆孤  
吳時花草于今在  
晉代風流世絕無  
別後故人須有得  
已應懷寶問歸途

姑蘇懷古和鮮于伯機韻

陸文圭

會稽俯伏遣行人吳國池臺日日新  
幙下盟歸金甲散  
宮中舞罷翠眉顰  
悠悠今古三江水  
寂寂英雄一窖塵  
笑問鴟夷身退後  
漁商何苦効齊民

虎丘留題辛卯三月書于劍池

伯業荒丘春草長  
只聽兒女話真娘  
虎來墓上猶應怪  
鹿入宮中儘可傷  
太息乾坤空浩蕩  
不留豪傑管興亡  
屬鏤抱恨沉江底  
潭碧猶生古劍光

龔子敬同遊桃花塢趙中時適至

郭祥卿

步光統郭撓青浪華氣浮空散紫霞小院碧桃留客醉  
隔林修竹問誰家清明過了春將暮濁酒傾殘日又斜  
一笑相逢誠不易人生看得幾韶華

吳中寒食

龔璘

寒食清明賣酒家酒瓶亂插白紅花江南燕子非一種  
日暖蜂房報午衙八十漁翁冒半破往來醉客路三叉  
村中女伴無忙事疎雨小塘收漾紗

登姑蘇臺

丁復

白日初高瓦影黑姑蘇臺前春拍塞百花緣洲水曲尺  
小浪羣吹度游鯽脂烟漲暖野荒荒箇箇西山淡疎碧  
海風東來揚短篷吳兒坼坐長歌發逸興遙將白波去  
送目飛鴻倦低翮扁舟甚有五湖思風雨漂搖從所泊  
幸逢大國全盛日地極蒼生無裂坼向來時運數更變  
河山南北烽火隔人攀岩穴恐不險樂土不居何暇擇  
只今城雉多墾鑿麋鹿所遊盡桑步自笑生來但為客

五十有家無土著有酒不作懷抱惡明日日出已非昨  
次可立詩

霞邊浮玉青霏霏吳中景物天下稀三江入海作春浪  
五湖滿地搖夕暉孤鶴忽與白雲起神龍或挾赤鯉飛  
胡牀抱膝但長嘯丈夫安得為輕肥

天平山

陳方

東吳水為州西山茲獨秀上有百歲松下有千尺溜況  
當泉石間野花亂如繡頓足忘僕勞長歌發予陋沉沉

范公祠肅肅香火舊碑猶鞏洛時寺當風雨後嗚呼一代尊廟食今誰守寂寞壯士懷松風動清晝

登姑蘇臺二首

薩都拉

閶門楊柳自春風水殿幽花泣露叢飛絮年年滿城郭行人不見館娃宮

野水滿城飛燕子誰家小艇載吳姬姑蘇臺上一尊酒落日昏鴉無限悲

夏駕湖

鄭元祐

吳王城西夏駕湖至今草木青扶疎想見吳王來避暑  
後宮濯濯千芙渠紺紅矗翠總殊絕誰似西施天下無  
西施醉凭水窓睡曼衍魚龍張水戲月上湖頭王醉醒  
歸舟蓮炬繁明星不知左擁右扇者越人日夜窺吳不  
暫捨

魏公祠

天平寺裏魏公祠翼翼蒸嘗奠荐時廟享百年亡國後  
道求千古聖人知山侵烏道盤風磴石拔鯨牙挿羽旗

更上高亭望吳下墓田秋實正離離

送劉長洲

中吳號沃土壯縣推長洲秋糧三十萬民力罷誅求苛  
時兼并家夜宴彈箏篴今乃呻吟聲未語淚先流委肉  
餓虎蹊于今三十秋畝田昔百金爭買奮智謀安知徵  
歛急名禍死不休高腴不論值低窪寧望酬賣田復有  
獻惟恐不見收日覺鄉胥肥吏臺起高樓坐令力本農  
命輕波上鷗天意憫困劇南轅卯金侯侯有萬金劑探



囊令病瘳甍者起雀躍瘡者言嘲啁坐令百里邑姦回  
息彫鏤是皆仁侯惠頌聲滿道周清朝攷功選賞典無  
滯留願侯登廊廟一洗蒼生憂

玉山佳處為顧仲瑛賦

東里東吳積水深海天削出青瑤岑肅侯諸孫有基構  
界淫築室如小林石根孚尹音浮筠蒸玉氣圻曲窈窕來

楚音籠鶴教馴合舞節池魚出游聽鼓琴樓臺花雨衆  
香國書畫芸香千古心按歌寧辭夜投轄彈冠又須朝

盡簪已傍苔磯學釣戈更上風磴窮登臨竹梧參天鳳  
鸞集老夫為爾長歌吟

崑山石

崑岡曾韞玉此石尚涵輝龍伯珠璣服仙靈薜荔衣一  
泓天景動九節劍苗肥閱世忘吾老蒼寒意未違

靈岩涵空閣

吳王宮闕草萋萋飛閣重登意轉迷洗硯池邊雲欲暝  
拜郊臺上日平西湖涵遠浪千帆沒樹響悲風一鵲栖

江海鴻夷招不返荒煙野草鷓鴣啼

遊嘉定道院

芙蓉洲上集仙宮環珮聲聞縹緲中  
桂閣吹香天樂下  
稻田疎脉海潮通呼龍起舞迎初日  
跨鶴歸來御晚風  
大藥已成金鼎墮丹光猶得兆年豐

簡張仲舉待制

宵占兩雨使星東川后迎恩啟闕宮  
海上天燈涵寶月  
惟中神語颭冷風雲團芝蓋香烟直  
春入衢尊酒味同

況是詞臣工致祝鯨波永息歲恒豐

送沈仲說遊杭

錢塘湖上水西頭歷歷山人舊釣遊相府猶餘秋水觀  
酒旗多挂夕陽樓春喧車馬松間寺夜載笙歌月下舟  
見說于今總消歇休文到目重淒愁

俞石澗讀易處

先生注易隱南城激石松風答澗聲式玉式金王度在  
一寒一暑歲功成要參未畫須心悟洞徹羣疑貴理明

蔀屋見星元是晝  
寰瀛振柁可無程  
義精詎忍辭捫舌  
樂大何妨枕曲肱  
雨露每滋庭草綠  
雲霞不斷晚山橫  
成林詎舍千章木  
求友難忘百嘯鶯  
歲月推遷陳迹在  
啟蒙常憶酒同傾

石湖十二詠

石湖

滄波渺千頃  
何處覓鷗夷  
同姓千年後  
流芳著斷碑

新郭

闔閭劍成郭俄徙傍河山酒旆千家寶今猶作市闌  
拜郊臺

吳子築圓丘祀帝存遺址魯亦取聖譏大禘同失禮  
行春橋

醉擁捧心過韶華艷綺羅至今湖濱上彩霓卧滄波  
越來溪

始由嘗膽鑒戰艦逐波通今日憑誰占漁家一笛風  
觀音岩

碧潭通海眼崖設大士座宛如訪天台石梁飛度過

治平寺

雲鴻蘊招提開窓面湖渚時發鐘磬音驚散沙鷗侶

茶磨嶠

孤嶼突蒼翠波環鬱盤盤誰嗜先春味當來製鳳團

楞伽塔

危峰峭浮圖七級雕闌曲影落湖波心魚龍駭常伏

越公井

隋將移城時鑿供萬夫飲清冷尋丈餘倒浸青天影

御書亭

敕賜宋名臣穹碑載奎畫至今孤亭中紅光照山白

紫薇村

公退紫薇省宅種紫薇花千樹臨山麓秋來榮晚霞

賦採香徑送吳邑張令陞佐嘉定州

泰伯常採藥深溪入芳菲攀桂作帷帳紉蘭製裳衣坐  
令文身俗悉從端委歸支脣後世君禮讓日漸違迷陽



行棘足藤蕪露沾衣三秀不改度齋房耀靈輝擷之荐  
瑶席神享民是依

寄吳江知州千壽道

熙熙愛日仰高亭亭外天寒渚栢青晚駕朱旂理公事  
夜燒銀燭校餘經吹烟白際魚龍國野稻黃鋪雁鷺汀  
三載政成儒業驗玉堂親擢暫須停

徐良夫耕漁軒遊題

幽館夏初度清林暑氣中開軒對流水坐石待薰風花

落陽中側鳥啼山幾空耕漁者誰子散髮奏絲桐

天平祠

西望層巒草木青魏公祠下拜儀刑經綸有策迴天地  
憂樂無時忘闕庭異代蒸嘗遵典禮故山香火下神靈  
浮雲變滅知何在閒聽松風語塔鈴

龍門

龍門截嶽倚天開點額神龍幾度來雲起樞中成五色  
星從罅裏見三台更無鐵檻嗤山鬼可有金鋪上石苔

李范黨同勲業異御車千古意悠哉

發吳門

陳基

少壯不解武衰老却從軍將相北出師步伍各駿奔伐  
鼓震城闕樹羽隱秋旻水師歟龍驤鐵騎紛紜屯軍容  
亦已肅士氣悉欲伸載咏東山什感激為逡巡顧子麋  
鹿姿辱參熊虎羣頽然介冑間見此逢掖臣微祿不逮  
養匪材胡足珍驅馳寵辱途俯仰媿君親秋風吹海濤  
落木滿江津去去勿踟躕浩歌天宇新

平望

下田不憂旱高田正宜雨四野已足霖三吳復無暑盍  
酒及豚蹄盤箸雜雞黍擊鼓樂社翁燒燈御田祖

分題得劍池送夏副樞

寶劍斲山石石斷餘劍痕靈池泄海眼絕壁拔天根轆  
轤卷晴雪洶若崑崙翻積厚早彌列波深夕不渾上馴  
伏丘虎下飲垂枝猿君行心不渝瑩徹鑒茲源

訪北寺無言講主留題

秋風日蕭爽散策入空林有竹心已清無言意彌深  
花不容把疎磬有餘音逍遙毘盧境落景駐遙岑

昭明寺

山居有餘樂縱遊良不孤生多濟勝具豈辭足力劬處  
處青蓮座人人僧寶珠雨花無宿蒂玉樹盡新株

天池

我覽天池作名篇如刺珉搢手亦何為未嘗造其濱清  
詩入朗咏洒然清我身何當托高翮去訪斛空人

范氏莊

田家近芒種客至已黃昏開門列芳席稍稍羅盤飧忠厚有餘訓詩書彌所敦琴詠衡門下聊復却塵煩

咏歸操

并序

吳興沈仲說築室吳江之曲養其祖母又鑿池構亭室之西偏曰咏歸每服田事親之暇輒挾琴書絃歌其中仲說之言曰昔者孔子感鳳鳥之不至慨圖書之不出退而修詩書禮樂之教于洙泗間

其徒身通六藝者七十二人孟軻氏曰孔子賢於堯舜又曰禹稷顏回同道嗟乎使孔子得聖人之位其徒固有宅百揆如禹播五穀如棄敷教如契為士如咎繇典禮樂如伯夷如夔其所試將不止于丹求之方六七十如五六十公西赤之為小相而致治之效又不止于仲由之所謂三年有勇者已周末造知德者鮮臨河之嘆君子蓋知道之不行矣于斯時也侍坐之頃乃有如曾點者雖或行

有所不掩其所志顧能合于聖人而異于三子者  
拘拘焉思欲用人之國而其所以浩然與天地上  
下同流于萬物之表者曾不過即其所居之位樂  
其日用之常而已一時動靜雍容見于鏗爾舍瑟  
之際千載而下尚能使人想象興起宛如衣春服  
從童冠而風于舞雩之下則夫夫子所以深與之  
者又詎可以言語形容哉方今聖神御極丕闡人  
文本詩書而施教原禮樂而敷治必德如顏淵位



之輔相勇如季路任之將帥辯如子貢使使諸侯  
藝如冉有俾居官尹其下亦且為方岳為百執事  
由是羣生異類圉形兩間者並沐仁義之澤可謂  
盛矣故走也藐焉一介栖遲壟畝獲于事育之餘  
自記狂獯之末咏歌孔子于熙洽之世尚志曾點  
于咏歌之所其得于天者亦厚矣尚何所願於外  
乎臨安陳基聞其言而韙之乃為咏歸操

我朝于田我暮于室曷以自娛有琴有瑟我服惟春我

樂惟親我欲浴乎沂濱匪舟兮孰先我津我欲風乎舞  
雩匪若人兮孰為我徒我葺我廬我讀我書我歆有菽  
我食有蔬我非悅此新構我咏歸兮匪夕伊晝我非愛  
彼流水我褰衣兮欲沿其沚聖如可作兮我從夫子

吳儂謠

時至正十四年秋七月海道都漕運萬戶府達魯噶  
齊明善公方糴米賑吳吳民德之作吳儂謠

城上日出走匍匐吳儂負米行且呼漕府君侯長萬夫

糴米食儂如哺雛君侯運粟輸京都都人食稅復衣租  
又以餘力甦焦枯連年和糴喧九衢吳儂有粟不得哺  
遂令斗米如斗珠不貴楮幣貴青蚨非侯哀儂釜生魚  
昨日兒飢苦嗚嗚今日飯飽走如駒君侯長漕非剖符  
不忍赤子生艱虞使君歸朝掌誥謨濟世昇平樂有餘  
天下米賤酒可沽上及父母下妻孥天子行當賜絳車  
君侯幸勿馳且驅

送姪讓還吳

西風蕭蕭鴻雁鳴行子悠悠隨旆旌百年衣食仰奔走  
四海甲兵紛戰爭猥將筆札事卿相叨備戎行陪俊英  
軍中草檄吾何有馬上操觚汝所能人稱阿買八分好  
吾愛永興戈法精吾女伊嘖學言語汝兒讀書知姓名  
中年竊祿正為此使有石田歸力耕汝今還家我羈旅  
各勸加餐調寢興升堂再拜謁從母兒妹踉蹌欣走迎  
扁舟石湖先上隴霜露既降草木零丁寧為我戒樵牧  
慎勿剪傷松柏青我欲還山結茆屋五岳逍遙期向平

乞身時辛苦未許南望白雲傷我情

分題太湖送鄭同夫

朝飲太湖水暮咏太湖秋太湖三萬六千頃七十二峯  
居上頭上稟咸池五車氣下浸日月涵斗牛鷗夷之舟  
從此逝功成身退合天道聲名萬古齊伊周江東步兵  
輕冕旒長揖齊王歸故丘尊羹鱸魚何足道上與造物  
同遨遊唐家拾遺巢許流躬畊湖上食杞菊不與濁世  
俱沉浮三人生不並世出處雖異心則侔至今血食

太湖上上下下雲氣蟠蒼虬  
今君遙別太湖渚鼓枻三高  
祠下路借得龍威一夕風送  
君彭蠡湖頭去

青絲絡馬頭送李彥章

青絲絡馬頭游宦古蘇州  
蘇州城東萬斛舟前年運粟  
直沽口送別江亭折楊柳承  
恩頭挿上陽花錫宴尊傾  
光祿酒江上今年楊柳黃辟  
書千里有輝光勇騎閩外  
將軍馬飽食閩中荔子漿閩  
中兒女歌白苧把酒勸君  
為君舞將軍好文不好武自  
古閩中稱樂土

八里莊寄吳中兄弟

晚泊清淮口臨風一振衣  
長河吞巨海平楚沒斜暉  
未覺鯨波險惟憂羽檄飛  
故園兄與弟歡樂我多違

送姪讓從軍武安

送爾徐州去秋風幾日程  
水通彭子國山擁楚王城  
虎帳耀瑜煖犀船五兩輕  
從軍古云樂今我不勝情

其二

世亂難為別他鄉復暮秋  
媿予叨入幕念汝獨登舟  
季

子裘空敝班生筆誤投恨無田二頃歸老石湖頭

癸卯三月十一日常熟阻雨寄吳門分省同官

一棹琴川路頻年此往還海風寒挾雨戍火連山澤  
國龍分節邊城虎據關故人南省幕退食珮珊珊

琴川懷古

揖讓思虞仲絃歌憶子游學文須到魯議禮必宗周  
俎豆今如此干戈苦未休慚非割雞手安敢話屠牛

寄沈仲說



欲采芙蓉寄所思  
秋風江露正離離  
每因見月懷玄度  
可但看詩說項斯  
溪上燕辭華屋早  
槎頭魚上碧波遲  
太平無事差科了  
歸共原泉理釣絲

其二

野人籬落並江濱  
竹裏流泉竹外雲  
好學索駒惟種樹  
莫誇司馬最能文  
小橋斜接漁樵路  
落日爭呼雁鷺羣  
獨憶咏歸亭上客  
久留城府思紛紛

寄家兄敬德

庭闈一月違溫清兄弟終年嘆別離  
落日有時成獨立  
秋江無處不相思  
雲邊白雁初傳信  
籬下黃花預有期  
甚欲卜隣依北郭  
故人誰送草堂資

秋懷寄玉山

江上秋陰十日多  
思君不見奈愁何  
風高澤國來鴻雁  
雨入汀洲落芰荷  
公子文章裁瑞錦  
美人衣袖剪輕羅  
畫船亦欲溪頭去  
聽唱花間緩緩歌

次韻鄭遂昌奉謁范魏公祠

皇皇卷服儼尊祠生氣渾如未死時天下功名韓相並  
關西威烈夏人知英雄未盡匡君策父老頻瞻出牧旂  
昭代尚賢嚴祀事詩人聊得薦江籬

次韻答秦文中學古

艤舟復向三江口載酒欣逢二仲來丘園束帛已加璧  
將相求賢無棄才柳色綠欺頭上雪桃花紅映掌中杯  
也應別後無知己從此柴門不浪開

其二

婁江繫纜已十日故舊獨逢秦與文氣壓元龍餘子服  
賦高司馬九重聞西山柱笏聊容我東閣招賢欲待君  
解却金貂換官酒賞花時節正春分

送成夫使吳門督漕事兼寄分院同幕諸公友  
挂帆南斗畧扶桑奉使寧辭道路長轉漕復輸滄海粟  
勤王爭羨紫薇郎風生漢節蛟龍避花繞吳宮雨露香  
同幕故人如見問為言憔悴鬢毛蒼

次韻謝總管送梅州判還崑山

畫船撾鼓待潮回  
山色留人不受催  
官酒醉淹羅袖溼  
離筵愁聽竹枝哀  
秋風老憶淮南桂  
暑雨晴收海上埃  
莫學君家子  
真叟變稱名姓不歸來

九日簡同幕諸公兼寄吳中兄弟

官舍蕭條淮水濱  
一尊九日漫相親  
那知黃菊籬邊客  
不笑紫薇花下人  
秋鬢白嗔烏帽側  
衰顏紅愛綠醅新  
吳中兄弟應相憶  
悵倚春風北望頻

癸卯二月十一日官軍發吳門

去年移戍秋將半  
今歲度江春  
正分晉國偏裨歸宿將  
漢庭旗鼓屬元勲  
戈船十萬盡犀弩  
鐵騎三千皆虎賁  
却笑高陽老狂客  
謾憑口舌下齊軍

送嘉定俠知州

俠家公子白狐裘  
兩度出為江海州  
誅求不廢農桑業  
撫字曾分社稷憂  
公勤職守古能吏  
清白傳家漢列侯  
老我叨居玉堂署  
送君欲泛練川舟

哭夷白二首

夷白即  
陳基也

白髮江湖一病身平生積力瘁斯文師門偉器今餘幾  
藩國奇才獨數君共愛辭華追董賈肯將出處累機雲  
生芻不到黃瓊墓目極五湖西日曛

老我歸來托遠林仙槁猶泛五湖深身名已喜全離亂  
生死俄聞變古今懸榻空餘徐孺恨絕絃真亂伯牙心  
無端又向溪橋立望斷秋鴻淚滿衿

陪方厓翁綠水園游矚

姚廣孝

熟游境已常偶到興偏適園廬依古閨門扉掃塵迹芳

景變清和羣植欣滋息雲浮曲渠水苔漬陰階石叢筠  
減舊綠蔓草餘新碧游蜂却乘霽歸禽自知夕臨幽憇  
煩跼遙思展芳席雖怡靜邊趣未達喧中寂茲因逢高  
士庶以樂無斁

奉答高啟季迪

清晨長松下聽禽坐逾深蘭章忽遠寄光華麗空林諷  
詠得密意展玩慰離心春晴見猶簡况茲逢暮陰

奉答楊基孟載



恹恹泊城南春深抱幽獨餘花猶綴紅衆樹已滋綠茲  
因塵內居始憶山中屋何時陪騎游吟看舊題竹

送友之松江得曙字

潮來沙磧平月落海門曙汀蒲轉風葉堤柳搖烟絮江  
頭春可憐天涯人獨去有歌送君行無酒留君住雪浪  
沒沙鷗雲帆出江樹回首讀書堆青山不知處

蠡口夜歸

日沒渡口昏水風著人熱漁燈帶螢火微光互明滅舟

人報水程路遙行欲歇故山不分明目盡心力絕遙想  
山中人待人仍看月

蘿徑為陳維寅賦

輿騎隘難通縈縈循礪曲蔓引行樵步葉密邀禽宿影  
分夜蟾白色帶春烟綠何當携孤琴間行追妙躅

登錦峯

奇峯起蒼旻秀色鬱可永靈石麗文華晴空炫霞彩爛  
斑馭青暈網縕襍芳靄朝陽映猶輝夕陰膏還藹或云

神丹仙鞭驅過滄海不經野火焚詎逐年歲改肅履曉  
飛陟昂然立如待延矚動幽挹架元時有在

琴臺

崇臺起雲岑夫差日遊宴七絃石上彈閨花落餘片風  
清答松響烟茸草成荐至今想餘音泠泠散秋院

劍池

湛盧埋伏深厓際立危壁波含金氣清苔吐鐵花碧龍  
光日夕浮蛙黷俱潛迹臨玩復何時吟餘慨今昔

白雲泉

陰泄自溶溶綿流仍脈脈輸練隔山青飛瓊混天白澗  
草帶幽香辟蘚清餘澤昔曾汲飲來依松駐金策

與王正仲游穹窿山留題顯忠寺

隄楊飛花三月後殘紅已無穠綠有湖山風物尚可人  
登臨又喜同心友巒迴徑仄不用輿凌空曳杖盤旋走  
峯飛天外曉雲騰瀑流谷底春雷吼烟蘿葉蔽啼鳥羽  
風林果落飢猿手望中隱隱蘭若出僧子相逢信非偶

暫留倦足憇孤榻欲豁吟眸啟孤牖詩聯美景意逾畫  
乳攪新茶味勝酒笑歌俯仰真自得盤桓不計時交酉  
去來奚足滯予心臧否何曾挂君口却嗟昔日不羈人  
今得微官即鉗扭我于奇勝儘窮討再理謝屐君須趣  
只恐天公忤人意風雨顛連不堪久明當歸去草堂眠  
輕橈仍繫沙邊柳

送李煉師還吳

薦紳吳下真澗藪獨欣東郭多交友我著田衣共頡頏

形骸相忘歲年久閒止文章力追古宗常學問曾無苟  
來儀才廣班馬倫縱橫筆下蛟龍走吹臺倜儻如達夫  
豈持百萬成斗酒萊邁讀書猶滿腹議論風飛鉗衆口  
幼文詞翰俱清俊處敬溫潤渾如琇仲廉居富曾無驕  
為學孜孜能謹守吁嗟諸子皆妙年自信黃鐘非瓦缶  
一時聲譽震乾坤萬丈光芒射牛斗鶴瓢先生清且秀  
深探道術持樞紐山房每與吾儕會茫然共入無何有  
我念披緇道不同豈知見愛情尤厚何如簡寂慕惠遠

至今高名傳不朽原修乃是先生姪道學向之能授受  
先生尸解已多年不意原修今白首余客朔方將廿稔  
故交零落存誰某形影相看我尚留命危脆若經霜柳  
原修忽作燕山游此會須知信非偶燈前笑語不肯歇  
舊好難忘常握手今秋欲返江南去鶴馭凌風如馬趣  
嗟我老矣不同歸雨泣如傾風夜吼

八月二十日出城西眺望過楓橋登天平白雲  
寺謁圭上人翌日到西麓時林園靚深庭桂盛

開天香滿屋可愛因懷韓奕先生不得共玩遂  
賦此詩以寄

我年已老宜逍遙北還未得心遙遙盡言山中秋正好  
眺望不待山人招清晨拂衣出城去籃輿直過江村橋  
橋西衆山環紫翠隴坂惟見芄芃苗人家門巷盡桑榆  
經過始覺先蕭條沿流路狹曲難認僕子每問肩柴樵  
虎岩深伏樹蒼蔚龍門斗起山峒崑白雲泉頭暫游目  
飛樓湧殿凌層霄主翁留我共禪悅且向竹所開山寮



果傳石鉢貯圓眼飯來香積炊長腰盤桓自足世外樂  
兩鬢不計清霜凋行行又復過西麓山深那得聞喧囂  
松堂晝閒人不到庭桂花發蘿烟消泐泐泉底日影動  
冉冉雲外天香飄此時獨恨無良友豪吟謔浪從通宵  
蒙菴先生舊曾約路遠忍使兒童要先生有道我所愛  
眎身不寔如芭蕉逃禪往往入深谷交往雲畫并杭標  
何由乘興忽來此把手歡笑今應饒便當沽酒效慧遠  
且留靖節傾山瓢

舟次松陵

一上松陵道秋懷便不同  
櫓鳴漁浦雨帘曳酒家風  
沙鳥雙飛白江楓半帶紅  
離人千萬意都在短亭中

重經常熟

鉅邑當吳北官無接送勞  
水多歸海近城半在山  
高僧寺餘庭栢人家盡  
野蒿重游逢日暮惆悵促回舸

寄高編修季迪

濟濟登明日雍雍際盛時  
朝回仍載酒講罷却刪詩  
尋

竹思龍阜看花戀鳳池自忘形服外游咏不須期

送蘇州府都綱還吳

網教臨吳郡安僧自有方北山松桂秀茂苑芰荷香杖  
錫辭天闕袈裟上野航相看嗟別去渺渺水雲鄉

題張山人適樂園林館十首

去官歸故里僑隱倚高林花月尊前友松風席上琴幽  
通西崦曲涼入北風深此處堪清賞時來一解衿

其二

巷僻無車馬閒扉掩薜蘿籠馴傳信鶴池養換書鷺開  
徑曾妨竹移梁欲避荷子雲真好古載酒屢相過

其三

虛館何幽絕深藏世少知柳雲堆夕檻蘭雨積春池戀  
客瓶存酒願神局罷碁餘生無一事不用慕安期

其四

室中無異物左右盡圖書不共漁樵侶還同水竹居弟  
曾呈蠟鳳客欲棄銀魚我獨長來此清談得緒餘

其五

開牖依林樾迢迢去市遥  
翠低承雨竹綠碎受風蕉  
夕嶺還侵戶春流欲斷橋  
主人緣愛客時為出山瓢

其六

遠遠依山郭荆扉向竹開  
聚螢兒懶出相鶴客頻來  
坐飲杯浮月行吟屐破苔  
春深花滿徑蜂蝶為遲回

其七

花徑斜通巷榆林遠隔溪  
曉庭輕騎集春閣亂鶯啼  
野

水流城北雲山峙屋西晚來吟興發獨往杖青藜

其八

一軒開小圃近水更悠然杏棟紫花霧芸窗宿篆烟竹  
藏鳩子哺苔觀鶴雛眠此地多風景悠然似輞川

其九

松桂園林屋遥知處士家踈簾宵進月虛幌晚承霞藥  
味園中木詩材檻外花尋幽來到此毋惜去程賒

其十

林居無俗韻琴史引來賓逕狹難容轍池深可縱禽登  
山新製屐漉酒舊裁巾我亦耽幽者他年願托鄰

寄周鶴林

廿載離吳下人傳少俊豪久羈燕地遠長想鶴林高池  
影涵秋月松聲鼓夜濤南還如有日尋訪肯辭勞

寄王光菴

學優何不仕奉母向桑榆今古書千卷乾坤宅一區竹  
臨窓更密蘿繞徑偏紆坐上賓朋少無營且自娛

羊祜廟

在吳城南大雲菴東沿河

探環桑下悟前身  
幼節知君不配人  
祇使才猷扶晉室  
肯施德澤被吳民  
荒祠積雨爐生蘚  
古屋無風壁受塵  
今日經過思峴首  
舊碑剝落淚沾巾

亂後入城有感

槐柳陰殘第宅隳  
行看不忍步頻移  
歌鐘寂寂無今日  
樵鼓鏦鏦似舊時  
人改衣冠逢罕識  
寺亡臺殿到還疑  
故交况盡東西去  
獨立斜陽倍感悲



王汝玉省廬墓回京除翰林院編修兼春坊贊  
善賦此為賀

賜歸上冢已還京復喜新除慰友情翰苑修文多寵貴  
春坊輔贊更恩榮墨濡彩筆松煤膩香染羅袍桂子清  
行見聖朝應大用不惟吳下播佳聲

百花洲上逢陸五

雲間小陸喜能文戲彩娛親是處聞今日百花洲上見  
蘋香荷影思紛紛

送昂上人遊洞庭諸山

西風飛錫度如舟  
來向湖山作勝游  
七十二峯青一色  
君看何處獨宜秋

經無量壽院

齊女門邊古佛祠  
小橋流水樹參差  
偶來看竹逢佳士  
指點園林說舊時

十二月廿一日舟出楓橋遇大風河凍河邊三  
宿復步歸西山海雲蘭若

曉發楓橋上野航  
官河水合路茫茫  
岸邊食宿連三日  
誰道家鄉是客鄉

寄陳嗣初

王汝玉

昭代鮮遺逸夫人尚沉淪  
豈無乘時志華髮有慈親  
傾家具甘旨勵操守清貧蹉跎四十載  
抱潔將終身嗟我媿非才  
叨陪侍從臣荐章豈所惜  
知子情未伸滄海風霜晚  
故苑芳華新勉焉慎自保  
綵服高堂春

贈鶴林周玄初

鶴林先生紫烟客丰神秀朗雙瞳碧早年學道逃人羣  
吳越名山遍遊歷靜中默悟天地真却歸高卧桃花春  
河東姹女未騰化滄溟回首揚紅塵丹書召入麒麟殿  
身披羽衣承燕見從此聲華傾上都五侯七貴爭迎餞  
西方神岳高崢嶸詔遣先生祠百靈道旁奔走二千石  
人訝真仙降玉京禮成俯伏拜大庭珮環拂地風泠泠  
四門闔開對黃道五雲回綵垂金城是時君王方穆清  
龍顏顧盼喜氣生賜以石髓所和之大羹賈生前席何

足榮罷朝上疏陳悃誠臣願乞身終素情綸音重降芙蓉闕特許先生返岩穴路出龍盤山外雲帆開揚子江心月青鸞白鳳來參差仙之子兮繽紛而相隨洞天冥冥兮千秋一時先生歸去兮猶未遲丹臺舊種金光草此際花葉方紛披懸知先生交構功已成欲將身與元化并長生之術尚可授我願相從閬苑行

寄耕漁子徐良夫

理世無遺逸君何獨遁逃方知唐虞盛乃遂巢由高耕

田中吳野下釣五湖濤帝力我安有熙然縱遊遨

和徐高尚同陳胡二文學虎丘遊集

中吳饒佳遊茲山極殊觀磅礴踞臯陸嶺岼軼霄漢靈  
岩南蔽虧震澤西衍曼宕堯見城堞參差瞻里閭飛甍  
凌巘出紺宇橫林奐餘霞皎夕陰初旭緝晴旦宗周昔  
無象四國爭發難闔閭紹遺業傲倪霸東翰雄圖未終  
畢宮車忽云宴年遙代祠忽世變物情換深藏閤雨花  
曲池冪烟蔓崩厓留鑿紋石駸餘劍斷諸君美無度假

日窮幽玩凭峭信多覽弔古亦增嘆重尋倘能卜偕行  
願相贊

初辭長洲縣庠

潜鱗貴幽沉迅翮當上征伊抱孱陋質俯仰難為情進  
趣既匪任退武復懷驚念往感多變顧始媿將傾茲焉  
幸返舊游息在柴荆谷行晨晦暖嶺眺夕澄明紅泉演  
紅澗碧磴披丹英時升烟霞表恍若凌長清素心自昭  
曠外物徒紛榮願同戰勝者觀化保嘉貞

古磚篆文歌

洪武某年范陽盧公武氏嘗過予城南舊居道出僧坊見甃壁古磚上有篆文隱起勢甚奇偉公武欲求得之時僧塗墍方飾各損壞弗肯予今年余復見之因抉壁豪取而公武沒已數載遂歸于公武猶子次農并作歌紀焉夫此磚不知綿歷幾千百年始獲發于公武今公武沒又數載不為他人持去而余獲歸于次農是豈物之遇有其時亦世之好事者恒鮮得



耶今年實洪武丁卯也

范陽盧君好奇古羅網前聞用心苦荒岩窮澤遍探求  
斷畫殘鈎總裒聚昔過僧宇見陶甓上隱遺書可瞻覩  
斑痕不假琢石磨缺角寧煩煉金補剝苔剜鮮試研尋  
浣土滌塵細摩拊未知纖悉無舛訛已覺縱橫合規矩  
疑從盆缶窺禹鼎似向雀蒲獲荆桔世遠那能究源委  
紋完尚可推編部詭形轉指龍盤拏逸態飛騰鳳騫舞  
整如康衢駕列駟踞若高岡蹲怒虎氣吞鄢郢練三千

價陋咸陽城十五蛇奔虺走莫徒誇劍拔弩張安足數  
範撫既不類臣斯體骨未應同詛楚恍驚孔壁得科斗  
真訝岐陽逢石鼓吁嗟篆法久變化惆悵簡書趨莽鹵  
不知此字誰揮洒欲與籀史爭參伍緬想東吳稱伯強  
曾聞季札聽韶濩一時文物豈無傳千古字書當有祖  
後人自合重千金故物不宜充百堵擬令僕夫遂携挾  
無奈主僧猶吝予中心往來累朝暮躋次周流更子午  
我昨重來經舊地盧君已沒歸荒土壁傾僧去物幸存

水濯雨淋文不竄巴人那識貴陽春甌駱由來賤章甫  
世無博雅同賞鑑獨發長吁為收取終然雄劍起豐城  
畢竟明珠還合浦可憐盧君難復生賴有阮咸能嗣武  
嘗臨滄海眺三韓曾入青徐弔梁父篋裏富儲金石錄  
胷中宏闢圖書府願言持送歸寶藏請共知音辨魚魯

送人歸吳

相逢不計別來年君鬢如蓬我皓然親友凋零知幾在  
江湖飄蕩喜俱全九重請告承新寵五柳還家老舊田

明發京華又分別春風應送洞庭船

寄吳中故人

鄉心離思共依依吳水吳山悵久違客裏頻看流景換  
老來偏感故人稀百花僧舍思攜酒細雨春林憶采薇  
一枕漂零江海夢夜深空趁蝶交飛

題畫送陳孟敷

君家門掩綠陰低古木叢篁水郭西我向京華望吳苑  
桃花只隔武陵溪

送趙友同之松江

畫船曉發鳳城東  
江上青山雲幾重  
秋水遙天三百里  
片帆一夜到吳松

送謝雪坡防禦出郭團練

楊基

朝催築城夫暮點團結兵  
民皆動搖一日十數驚  
所賴官長賢撫勞得衆情  
防禦出郊來父老拜且迎  
垂髫及戴白羅列車下聽  
官家百萬師自足與寇爭  
汝自守汝鄉汝自保  
汝生閒暇苟不虞倉卒恐見傾  
我當習汝

勞薄爾賦稅征父老共感激聞然動歡聲旌旗泊甲矛  
五色稍鮮明豈惟備抄掠大敵固可嬰問君何能然子  
弟衛父兄平川雨初收馬嘶鼓蓁蓁相送不同往極目  
秋鷹橫

茂苑思二首

輦路秋蓬滿野香團綠濕嬪娥粉黛愁花鉛松露泣  
鶯聲舊時好玉砌秋歸早東家蝴蝶飛烟姿滿芳草

白門答高二聘君

戊申之秋余謫大梁李廸嘗夢余與語若平生明日  
道路傳余已死李廸有夢余詩已酉春正月余獲侍  
親東歸李廸亦應召來京師相對驚喜因出示所賦  
夢予之作予既感李廸之念而復疑猶夢也歌以答  
之

結交貴知己不在早與遲嗟予識子晚淺深惟子知每  
于朋儕間擊節賞我辭前年吳城破子居我西馳交遊  
非不多獨念與子離相去日已遠數與禍患罹道路傳

我死可信子尚疑日暮過我廬為我涕交頤今年我還  
京適子應詔來叶握手發長嘆示我夢我詩我昔患難  
中精爽無不之而子獨夢我與子若有期方子夢我初  
正我念子時春風鳥嚶嚶花發滿故枝為賣一斗酒痛  
飲春江湄生死固常理勿為達士嗤

食燒笋留題陳惟寅竹間

春雷一聲萬簍玉參差亂迸莓苔綠斬來掃葉當徑燃  
何異燃萁煮秋菽登盤查牙玉版肥焦尾碎剝蒼龍皮



山人大嚼無物報寫作林間燒笋詩

過陳湖贈寄周明府

蘭苕參差桑柘綠細雨岡頭啼布穀人家破產給丁夫  
麥未上場蠶已熟無蠶催絲綿無麥督稅錢民間此愁  
誰見憐君侯為我解倒懸

聞玉雪將還吳門

桑葉重重戴勝飛行人多報故人歸鬢從別後星星出  
花到春深樹樹稀詩喜官閒能不廢身緣謀拙事多違

便須出郭相迎迓遮莫南風雨滿衣

懷王隱君正仲

小几支頤却拵書身閒復喜見秋初山林自此縱橫落  
締綌于人次第疎沙鳥浴江明白鷺水花揺雨淡紅蕖  
相知獨有王摩詰兩月無詩寄草廬

附王半軒次韻寄答

懷刺歸來卧枕書白雲滿榻閉門初草玄未信揚雄病  
禮法從知阮籍疎短障夕陽悲蟋蟀方塘秋水老芙蓉

南村口燥呼難得一任狂風攪敝廬

懷高著作李迪

坐看清江飲白虹不知樓閣又秋風  
瀰漫禾黍蒼烟外零落芙蓉暮雨中  
富貴逼人驚變豹文章鳴世豈雕蟲  
清時欲草征西檄只有陳留阮瑀工

徵趣赴京

亂後人如再得生敢于世上望聲名  
詩吟白屋惟安隱詔落丹崖陡失驚  
鳳闕有心求柱悅鰕材何量祇瓶罌

不堪故舊愁分手楊柳楓橋第一程

送周鍊師玄初還吳

玄都春暖碧桃開鳴佩朝天到鳳臺  
夜檄雨龍江上發曉呼雲鶴洞中來  
黃精却老和泉煮丹橘娛親繞舍栽  
為問長生應有術早修真籙進蓬萊

送僧住蘇州北禪寺

六年江海一論心又聽鐘聲出禁林  
歸路暖風芳草合講堂春雨落花深  
未誇葛老三編論獨愛韋郎五字吟

水月傍人塵不染待君重振海潮音

哭高季迪舊知

鸚鵡才高竟殞身思君別我愈傷神每憐四海無知己  
頻覺中年少故人祀托友生香稻糈魂歸邱隴杜鵑春  
文章穹壤成何用哽咽東風淚滿襟

舟泊潯陽懷申屠衡

江烟漠漠草氈氈且泊蘭舟近水南一鷺暝投槎外石  
雙鴻低拂樹邊嵐夢隨春雨歸華屋愁逐東風上短簷

柳色漸深人漸遠幾時花裏共停驂

舟中聞鄰船吳歌有懷幼文來儀

輕帆短楫泝烟波疊渚回舟奈遠何一路詩從愁裏得  
二分春向客中過江通漢水晴偏綠山入湘雲晚更多  
何處思君腸欲斷楚妃祠下聽吳歌

天平山十四題

龍門

天開一罅通石古雙厓破中有波浪痕知是龍飛過

石室

六丁運神斤鑿石為巨屋風雨繞入窓夜夜山鬼宿

五丈石

星落長百尺風雨忽中斷至今雷火焦突兀猶存半

白雲泉

冷冷白雲泉流向白雲邊泉水流不斷白雲飛上天

一線泉

石竇小如針泉飛一縷金天風吹不斷穿過白雲深

卓筆峯

露鮮凝斑管烟蘿束紫毫山靈罷揮洒卓立萬山高

釣魚磯

父老兆作熊遺石此山久誰摻百丈竿重試連鰲手

蟾蜍石

神蟄月下來化作千歲石曾吞玉杵霜清露時時滴

頭陀岩

頭陀不可見岩石似當時草長齊眉髮雲裁百衲衣



華蓋松

飛蓋結龍形斜扛九曲清流螢枝上落疑是紫微星

飛來峯

高峯似玉臺何處忽飛來定向西天竺曇花頂上開

四時亭

泉聲四時清山色四時好不知寒暑移但覺松山老

宿雲軒

盈盈山中雲就我簷下宿昨夜雲不歸空閒半間屋

照湖鏡

團團山中石下照太湖影如何一鑑中三萬六千頃

初歸吳中感事

附郭好山遠近繞城流水東西人哭人歌夜月花開花落春風

赤山閒居

荷鍾繞籬栽菊解衣上石觀松甘分簞食瓢飲底須千  
駟萬鍾

抱膝長吟梁父折腰寧媿鄉兒酒呼白墮朝飲米糲雕  
胡晚炊

寄陳惟寅惟允

坐有重氈食有魚眼能識字手能書山於秋水船頭看  
家在春波門外居

冰

連日困毒熱思冰不可得因賦五言排律一首書篋  
上亦庶幾望梅止渴之意也仍邀來儀李迪幼文三

文學同詠

凌室啟深藏殊恩錫上方壺清迷練色甌薄耀寒光當  
座人俱素登筵體共涼瑩含銀永潔甘苻蜜脾香淺碧  
迎歌扇微紅映舞裳明愁難作鑑堅恐易成漿瑞擬金  
窓雪勛高玉井霜屏慚雲母熱簾詫水晶涼醉客狂思  
聶詞臣渴願嘗

南峰宴坐僧

空岩槁木形入定拵松局鶴供銜來果猿看誦罷經雲

霞埋衲重苔蘚上鞋青只有樵人識曾因采茯苓

泰伯廟

古者魯夫子曾稱三讓名後來秦失鹿劉項苦相爭

寄錢翼之

作賦擬相如何人誦子虛琴彈中散操扇玩右軍書北  
闕青雲近南冠白髮疏煩君傳遺逸著我人樵漁

江南曲

遙天碧蕩蕩遠草綠惜惜併作相思海春來一樣深

簡錢翼之

碧樹綠蕪空亂雲故人何處隔江村  
舊書在手再三讀  
新恨從頭又一番竹幘隨行家具活  
蘭亭摹出典刑存  
幾時定訪揚雄宅為問太玄經裏言

南峰歸雲菴

雲伴老僧居翠微老僧應共白雲飛  
杖藜西去雲東去  
日暮僧歸雲亦歸

吳中菊花盛開

菊花三百六十種處處名園花不同  
安得化身千百億  
一花著取一吟翁


吳江石橋新成

五色何年補沈寥  
百弓無地架瓊瑤  
老龍千尺卧寒玉  
雌霓半空橫彩綃  
天路行看星象逼  
江濤怒息水犀驚  
騎鯨便欲超銀漢  
直踐台階挹斗杓

竹枝詞

莫折閭門楊柳條  
帶將離恨過楓橋  
向道春愁不禁蕩

蘭舟長放艫輕搖





吳都文粹續集卷四十九